

NIYAMAYA

Buku Esera dokome lao yaki niyamo dokona piso buku Niyamaya lenge dakeme nyekonyo letamo. Arome pii rema dasipa kunjisi ingyuo pyasi palamo.

1. *Rombo 1:1–7:73a* Yuu Pesa kiŋi Sairoseme akali Niyamaya lenge doko yuu Juta dokona wambu dupwa iso karala pena leya. Niyamaya yuu Jutana taone mupwa Jerusaleme dokona epeyamopa Juu wambu kareyaminyi dupwame Jerusaleme dokona kana kame andake doko dee kamba waso piyami. Piyaminyi dokopa Niyamaya baame yulu doko rapu piya. Eserana Anatu lakandenge yulupi dee role pyao yango pipya karenge yulupi yulu dopale wambu dupwana au pyuo sero karena lao kareya.
2. *Rombo 7:73b–9:37* Rapu pingi Esera baame Anatanya Mawa Pii buku andake piyamo doko yaka lao ketae pyambu wambu dupwa polo lamaiyuo kareya. Yaka leyamo dokopa Juu wambu dupwame pii doko soo nyepala nakamana yulu koo dupwa polo lamaiyami.
3. *Rombo 9:37–13:31* Yuu Juta dokona Niyamaya baame iso kareya pii lapo konda pyuo piyami dupwa pyasi palamo. Niyamaya baame Anatu keta pyamalyuo karo atēja lamaiyuo kareyamo doko ama renge andake ingyuo palamo.

Niyamaya baa yulu poraiyuo pingi. Ateŋa wakasa lenge dee Anatu kapa pira lao suu pyao otenge akali.

1 ¹Akalayana ikinyingi Niyamaya banya arome pii dupwa pyasi palamo. Niyamaya baame dopa leya.

Niyamaya Baa Jerusaleme Dokona Lao Kandapala Suu Piya

Yuu Pesa kiŋi akali Atasesisi baa kiŋi yulu kanda soo pyuo karo enakana ee kana akalisa lama banya yulu miniyamopa kana Kisilepe dokopa yuu taone mupwa Susa lenge dokona kareyo. ²Kareyono dokopa nambana yangonge Ananimoo Juta akali lapo pipya epeyami. Epeyaminyi dokopa nambame Juu akali dupwa pyao kumaka nao yuu wakale mendasa puu maiyuo nyii nayami dokona lao piso siyu. Dopako pyuo yuu Jerusaleme dokona lao opetae piso siyu. ³Piso siyunu dokopa nakamame namba langyuo, Wambu yuu Jerusaleme karaminyi dupwa

akali dupwa pyao kumaka nao yuu wakale mendena puu maiyuo nyii nayami dupwa nakama randa andake nyuo elyame kumuo karaminyi. Karaminyipa Jerusaleme kana kame kameya awali lao piro kareng doko lalyuo bolombalo lasi silyamo. Dee Jerusaleme kambu dow kameya dupwa isareme rao lalyuo kokwa siya, leyami. ⁴Leyaminyi doko sepala yuu gii lapo ee lao kumanda peteyo.

Pisipala dokopa namba nenge naa nao Anatu yake panda kareng doko atēja lao kandalyo kando peteyo. ⁵Pisipala dokopa dopa leyo, O Numi Anatu, Emba Kamongo mupwa wakasa ingyuo karene doko namwa pako karamano. Wambu emba kando mona retenge dupwape embena mawa pii yaki nyii nao minyuo pyuo kareng dupwape pipya emba pii lao kana minyuo kinyi lalu lao lenge doko minyaro karene. ⁶Embena kendemande Isaraele wambu dupwa emba kando koo piyama dupwana kondapala polo langyuo kukwa korakamape atēja lao pyuo karo doko emba kando sepe. Kinyi nambape nambana rakangena ree palupi koo piyamako, lamaiyu. ⁷Lamaipala dokopa embena kendemande akali Mosese keta mawa pii jiinyi dupwape moko minyuo pyuo kara nalyamano. Dopa pyuo karo embame namwa pelapa langiinyi dupwa kamba lao yulu kopetame pyuo karamano. ⁸Pii embena kendemande akali Mosese lamaii. Embame baa dopa lamaiyuo, Nakama Isaraele wambu dupwa langirunuli pyuo kara narami ramo dokopa nambame nakama yuu wakale dupwana bolombalo lao nembaro doko kame see nao karape. ⁹Dokopa nakama namba karo dakena dee kamba kapa kyuo epapala nambana mawa pii doko yaki nyii nao minyakao kararami ramo dokopa nakamana wambu dupwa yuu nanesa puu maiyuo nyuo minyuo paraminyipape nambame nakama yaki nyii napala range nyuo sukusa sukusa pipala yuu mupwa enenge mendena namba lakando kararamini lao yapalyo nyepala dokona karalapa lao jero, lamaii kande, leyo.

¹⁰Lapala dokopa Kamongo doko dapwa embena kendemande emba rangena wambu kandale. Embena porainya rene andake dokome kiiramo nyii dupwa karaminyi. ¹¹Embena kendemande akali Niyamayana atēja lenge dokope embena Isaraele kendemande wambu menge dupwa emba rape rape lao karalana suu pingi dupwana atēja lenge dupwape sepe. Epapu namba embone pisinyi pyambu akali kiñi karamo dakeme namba kandapala kondana lao nyisinyi lao karape, Anatu lamaiyu.

Yuu gii dusipana namba kiñi akalinya nenge ipwa waenepe minyakamyuo epo maipapu pingi akali ingyuo karapala yulu dupwa pyuo kareyo, leya Niyamayame.

Niyamaya Baa Jerusaleme Peya

2 ¹Kiñi Atasesisi ee kana akalisa lama kiñi yulu pyuo kareyamo dokopa kana Nisane dokopa ipwa waene siyamo doko nyepala kiñi

doko minyuo pao maiyu. Wamba namba kinjinya lenge kambu dokona namba mona rando kumasi lenge kambu nyilyunu doko kanda nange. ²Rae mai nayo dokona kinjimi apa pipyasa embena lenge kambu yanga nalyamo lao piso siya. Piso sepala dopa lao, Emba anga pyaa nalyamo. Rae mai napisa embena mona kendo pilini, langiya.

Langiyamo dokona namba walu lao pakame kumuyu. ³Pakame kumapala kinji lamaiyuo, O Kiñi palu karalu karape. Nambana rora ambasupi yuu dokona malu piyami doko momo nao dee yuu dokona kame kambu dupwa isareme rao kokwa sinyi nembeyaminyi dokome apa pyuo namba porayapala mee mona kyuku renge kararose? lamaiyu.

⁴Lamaiyunu dokopa kinjimi namba langyuo, Nambame apa pyakapili lao piso silini? leya.

Dokona lao Anatu yake panda karamo doko kando piso soo ateja leyo. ⁵Ateja lapala enakana kinji lamaiyuo, Embame embena kendemande akali namba kando ama raeko maiyuo karare ramo doko namba yuu Juta dokona yuu taone andake nambana wambu rora ambasupi karo kumuo peyami dokona taone doko elya pyuo karala puu lao nembape, lamaiyu.

⁶Enda kuini doko baa maki pyuo peteyamopa kinji dokome yuu gii akipare karapala eparese lao piso siya. Piso siyamopa namba yuu gii dusipa karapala eparo lao lamaiyuokondali piyu. Dokopa kinji dokome namba kapa puu langiya.

⁷Pii mende kinji lamaiyuo, Emba namba kando rae mairi ramo doko pepa pase pyapala jere. Jerenepa nambame minyuo pao gapomane akali dupwa yuu doko yuu kinji Ipwa Yuporisa Dumarena lenge dokona iso karengge dupwa mairu. Mairunu dokopa nakamame namba kapa puu lao nembaraminyipa namba yuu Juta epo kando nyepala kararo lao kinji baa lamaiyu. ⁸Lapala dokopa embame pepa pase mende jerenepa minyuo pao akali kinji Asape lenge kinjinya imwa rapu pingi akali dokome isa pinginyape imwape lapo jeramo dokome yanda singi tembole anda rapu pingi dupwana anda dokona kame kambu kameya pyakamiru. Pipala yuu taone andake dokona ka'a kame doko opetae pipala dokopa namba range anda palirunu doko opetae piruko, lamaiyu. Lamaipala dokopa nambana Anatumu namba yisiyasa kinji dokome namba mende pyakapyali lao piso siyunu dokopa jiya.

⁹Jepala kinji akali dokome yanda singi mupwa dupwape akali ose matana petenge dupwa pipya nambamoo wambo role pyao pupwa lao nembeya. Nembeyamo dokopa yuu kingi Ipwa Yuporisa Dumarena lenge kata lyuo peyo. Papala dokona kinjinya pepa pase doko gapomane akali dupwa maiyu. ¹⁰Dokopa yuu Orane akali kingi Sanepelate lengepe akali kingi Topaya lenge yuu Amo dokona mupwa karenggepe dolapome namba Isaraele wambu nyisala epeyo doko sepala ama imbua kareyambi.^a

^a 2:10 Jerusaleme kana kame lalyiyamo doko poraiyuo kandamapeyo. (2:13)

¹¹Dopa pyuo kareyambinyi dokopa namba Jerusaleme kando nyepala dokona yuu gii rema mee kareyo. ¹²Karapala dokopa nambana Anatumi Jerusaleme dokona mende pipi lao monarena langiyamo doko nambame mendali lamai nayo. Lamai napala namba kukwa sipurapala akali mendasipa nambamoo role pyao peyamano dokopa mena donge dupwa karena lapala mendaki iki nyepala piso peyo. ¹³Peyo dokopa kukwa dokopako nambame yuu taone doko yaki nyuo kame kambu kingi Yuu Lama Lama lenge neta yalyingi dorena singi kata dokona pao ipwa kamuo nyingi pete kingi Kau Pambeya donorena singi lenge dorena palyama palyama pao kame kambu kingi Rone Nembenge lenge doko kando niyama. Paole pyuo karo dokopa namba Jerusaleme kana kame lalyiyamo dokope dee kame kambu isareme rao kwaeya dusipa repeta pao poraiyuo kandama peyo. ¹⁴Papala yuu taone andake dokona neta potemenge dorena dulurena pao kame kambu Ipwa Guu Lenge lenge dokona epapala Kiñinya Ipwa Pete Singi dokona epeyo. Epeyo dokopa donge namba piso epeyono doko paramo kata doko see nayasa saka naya. ¹⁵Saka napala kukwa dokopa pao yuu lama lama kingi Kitone lenge dokona lano pao dokopa kana kame doko kandama peyo. Papala namba peyono kata dokona kapa kyuo epo kame kambu kingi yuu Lama Lama lenge dokona sukusa pao yuu taone dokona kamba peyo.

¹⁶Dokopa akali kamongo dupwame namba anja pupi laope apa pipi laope see nayami. See nayaminyipa Juu yango purisi akali dupwape lita akali dupwape kamongo akali dupwape wambu munge yulu dokona piramale dupwape dupwana mendepe lamai nayo. ¹⁷Dopa piyunupape enakana nakama lamaiyuo, Nakama namwa randa nyimwa doko kandelyaminyi doko yuu Jerusaleme rao banamau lapyo kame kambu dupwa rao kwaeyo pipiyamo doko kandelyaminyi. Namwa elya napala Jerusaleme kana kame doko dee kamba range pimanale ipupwa, leyo. ¹⁸Lapala dokopa nambana Anatu dokome namba nyisiyamo dokona lao nakama lamaiyuo kiñinya pii langiya dupwa opetae lamaiyuko.

Lamaiyunu dokopa nakamame namba langyuo, Sipurapala pimanale, leyami. Lapala nakama yulu keyange dokona suu pyao poraiyuo pelana kanda siyami.

¹⁹Dopa piyaminyi dokopa Sanepelatemoo Topayamoo Arape akali Geseme dokomoo doo pinya piyamano doko sepala dokopa giyalya giyana pyuo lao kilya kandalya kandana pyuo dopa lao kareyami. Doko apa pilyamisi? Kiñi doko kando kamba lao isa palyamwali lao piramisi? leyami.

²⁰Dokopa nakama isingi lamaiyu, Anatu yake panda karenge dokome namwa ree jepala mondo lao pipala karalamisi laramo dokona namwa banya kendemande wambu dupwa sipurapala pirama. Piramanopape

Jerusaleme liti mende kana semene palya nasi dokome yuu nakamana ingya nalyamoko, lamaiyu.^b

**Wambu Dupwame Niyamayana Yulu Isa Nembalana
Leyaminyipape Baame Nakama Anamasi Minyiya**

4 ¹Sanepelateme namwa kana kame piyama dokona sepala baame imbu singi manjo Juu wambu dupwa kando giyalya giyana pyuo minyoko pili lao kareya. ²Banya yangonge dupwape Samaria yanda pingi akali dupwapena lenge kambu kando dopa leya, Juu wambu wale wale lasi dupwa apa pilyamisi? Nakamame bange kwaenge dupwa kapa pyuo dee singinyili pyuo pyuo waselana pilyamisi? Nakamame mena pyao kiso maipala yuu gii mendakinya kana kame pyuo otaramisi? Kana rao longasi dupwa isa pao siyamo dupwame apa pyuo kapa nyuo kana kame piramisi? piso siya.

³Piso siyamo dokopa Amo akali Topaya lenge doko akali Sanepelate role pyao karapala dopa leya. Kinyi lene. Suwa rae lenge mendeme nakamana kana kame dokona pulyara ramo dokopa kana kame doko boo lara, lamaiya.

⁴Dokopa Niyamayame loma soo lao, Namwana Anatu wambu dupwame namwa rae pisa nalyaminyi dokona pii dake sakape. Pii doko nakama letaminyili pyuo nakama range keta kyawa sisinginya palyakamipi. Nakamana yuu doko namwana yuu kwaeya siya dopaleko ingyuo kwaeyo sinya lakape. Dee nakama dopako pyuo puu maiyuo yuu wakale mendena lanyuo pena lakape. ⁵Akali kana kame pilyaminyi dupwana lenge kambu dokona nakamame imbu singi nyakamilyaminyi dokona nakamana yulu koo pilyaminyi dupwa nyuo kame sakami napipi.

⁶Wambu dupwa nakamana suu pingi dokome poraiyuo suu pyapala kapa pirama leyami dokona kana kame doko piyama. Pipala dokopa kana kame doko anda kanya dokona pyuo palyiyama.

⁷Dokopa Sanepelate Topayapa dee Arape wambu dupwape Amone wambu dupwape Asotote wambu dupwape Jerusaleme kana kame kamba waso mondo lao piyamano doko dee kana kame lalyisi rete dupwa kanda soo upi leyaminyi doko sepala nakama imbumi kumuyami.

⁸Imbumi kumapala nakama peparae epo lao palyapala Jerusaleme wambu dupwa pyao yulu doko kuimu kaimu palyuo nembalana leyami.

⁹Leyaminyipape namwame namwana Anatu baa kando lao ateja lapala namwana kando iso karengi akali lapo karo nyisu petenge wambu dupwa epa nana lao kando iso karena leyama.

¹⁰Leyamano dokopa Juta akali dupwame kenane pyao dopa leyami.

^b 3:1-32 Juu wambu dupwa liti pipala Jerusaleme kana kame piyami. Liti mendaki mendaki lao kana kame dokona make mende nyepala yulu piyami.

Yulu malu pipala yulu pingi akali dupwa maka suku suku
nelyaminyi.

Kana longasi malu sipyamosa

namwame kana kame kapa pinya saka nalyamano, leyami.

¹¹Leyaminyi dokopa namwana nyisu petenge wambu dupwame lao, Nakamame namwa kando soope pipa naraminyipa sukusa epapala nakama pyao kumakao yulu doko kaena larama, leyami. ¹²Dokopa Juu akali lapo nyisu petenge wambu maki palenge dupwa epo namwa kareyama dokona pao kamba kamba langiyaminyi siyama. Namwana nyisu petenge dupwame namwa pyalana lao lao reteyami doko langiyami. ¹³Dopa pipala nambame nakama kana kame matarena kata rete siyamo repeta nakamana rara wambu lili pyuo petena lapala nakamana wua gelape kaku yandape dupwa rapa rapa pyuo minyaro petena leyo.

¹⁴Dopa pipala kando sipurao lita akali dupwape akali isingi dupwape dee wambu menge dusipape lamaiyuo, Nakamame doloma kando paka nalapape. Kamongo wakasa ama porai doko baa suu pyapala nakamana yangongepe ikinyingipi wanengepe endape dee ree palu dupwana lao reke lao yanda pilapape, lamaiyu. ¹⁵Lamaiyunu dokopa namwana nyisu petengeme nakamana pii lao palyuo reteyami doko siyamilyamo lao siyami. Siyaminyi dokopa namwa peparae kapu kyo pao kamba kana kame yulu piyama.^c

¹⁶Yuu gii dokona piso nambana wambu kanya dupwa liti pipala mendeme kana kame doko piyami dokopa liti mendeme namwana kakupi konambepe yandape kapame wasisi bange poraipi minyaro kareyama. Dokopa lita akali dupwame Juu wambumi kana kame pyuo kareyaminyi dupwa paka pyao siyaminyipa piyami. ¹⁷Dokopa yulu bange soo epenge akali dupwame kingi pakirena yulu pyuo kingi pakimi nakamana yanda kakupi minyaro karo epeyami. ¹⁸Yulu pingi akali peparae wua gela mendaki mendaki lao marapunya manjaro karo yulu piyami. Piyaminyi dokopa akali byara yale bikuli poo lenge doko namba repeta kareya. ¹⁹Nambame lita akali dupwape akali isingi dupwape wambu menge yulu piyami dusipape kando lamaiyuo, Yulu doko andake ingyuo siyasa namwa panda wakale wakale karo raeyo pela pelyamano, lamaiyu. ²⁰Lamaipala bikuli pii akali poo laramo doko siyami kande dokopa yuu dokona namba pipya epo malu palyarami. Namwana Anatu dokome namwana lao yanda pyakara, lamaiyu. ²¹Dokona lao yuu gii peparae namwa pakimi yulu poraiyuo pyuo kareyamanopa pakimi kaku dupwa minyaro karo pao kwualepalepa bui pyakayamo dokopa kaepa piyami.

^c 4:15 Akali dupwame kingi paki rena yulu pyuo kingi pakimi nakamana yanda kakupi minyaro karo epeyami. (4:17)

²²Yuu gii dokopa wambu dupwa dopako pyuo lamaiyuo, Namwa akali peparae dupwape namwana kendemande dupwape Jerusaleme kame sukusarena kukwa dokopa palimanale. Kukwa dokopa namwa iso palu yuu yangaramo dokopa yulu pirama, lamaiyu. ²³Lamaipala dokopa nambamoope nambana yangonepe nambana kendemandepe iso kareng akali namba pelyonyili pyuo epenge dupwape namwana komau dupwa roko alowa pii nayama. Alowa pii napala akali peparaeme yanda kaku kingi rakana palyaro kareyama.^d

Esera Baame Wambu Dupwa Anatunya Mawa Pii Doko Yaka Lao Lamaiya

8 ¹Wambu dupwa peparae kana kame kambu kingi Ipwa lenge repeta kamapi dokona sukusa sukusa pyuo malu palyiyami. Dopa pipala dokopa nakamame Mawa Pii mana lenge akali kingi Esera lenge doko lamaiyuo, Mosesena Mawa Pii buku Anatumi Isaraele wambu maiyamo doko minyuo epena lamaiyami. ²Purisi akali Esera dokome baa Mawa Pii buku doko wambu malu palyuo peteyaminyi dokona minyuo epeya. Epapala dokopa kana yanda ipingi yuu gii mendaki dokona enda akalipi wane wanakepe api mendeme Mawa Pii seramili dupwame soo peteyaminyipa Esera Mawa Pii doko yaka leya. ³Dopa pyuo leyamopa yangamana piso pao korakama kana kame kambu kingi Ipwa lenge repeta dokona kanda kanda piso yaka leya. Dokopa wambu peparaeme kale yukupala pii sokondali pyuo peteyami.

⁴Mawa Pii mana lenge akali Esera doko baa pii lao kareng ratende pyuo wasiyami dokona ketae kareya. Kareyamopa akali Matitayamoo Sema Anaya Uraya Ilikaya dee Masayamoo dusipa banya kingi rolaerena kareyami. Kareyaminyi dokopa akali Petayamoo Misaele Malikasa Asumu Asapatana Sakaraya dee Mesulamemoo dusipa banya kingi kyairena kareyami.

⁵Dopa piyaminyipa Esera baa rate dokona ketae kareyamosa wambunya lenge kambu dokona buku doko lumbuyamopa kapa kandapala nakama peparae roya kareyami. ⁶Kareyaminyi dokopa Eserame Kamongo Anatu andake ingyuo karamo doko lakandeya.

Dopa pyuo lakandeyamopa wambu peparaeme nakamana kingi ketae pyambu kinyi kinyi lamaiyami. Lamaipala dokopa nakamana wapambu pii pyaro piso Kamongona kingi lao ayemba pongwa nao peteyami.

⁷Wambu dupwa soo kareyaminyi dokopa Jesuamoo Bani Serepaya Jamini Akupu Sapetae Ota ya Masaya Keleta Asaraya Josapate Anane

^d 5:1–7:73 Juu wambu lapo randa nyuo kareyaminyipa dee nyisu petenge dupwame Juu wambunya kana kame elya pingi yulu doko ukiaki minyalana kareyaminyipa Niyamaya baame roleya. Kana kame pyuo oteyami. Juu wambu Bapilone dokona karapusi ingyuo piso wambo Juta epeyaminyi dupwa yaka lao pyao reteyami.

Pelayamooome wambu dupwa Mawa Pii dokona polo lamaiyami. ⁸Polo lamaiyuo dokopa nakamame Anatunya Mawa Pii buku dokona kambunya eja nembo leyami. Dokona lao wambu dupwa soo nyeramiñi lao renge angi polo yaka leyami.

⁹Wambu dupwa peparaeme mawa pii sepala dokopa ee leyami. Dokona lao yaka leyaminyipa Niyamaya baa Jerusaleme gapomane yulu pyuo kareyamo dokope Esera purisi yulupi mawa pii mana lenge yulupi pyuo kareyamo dokope dee Lipae wambumi mawa pii polo lamaiyuo kareyaminyi dupwape nakama peparaeme wambu dopa pyuo lamaiyami, Yuu gii dake nakamana Kamongo Anatunya yuu gii poo pyasi ingyuo silyamo dokona nakama ee lao kumaraleralale nyii nalapape, lamaiyami.

¹⁰Dokopa Esera nakama lamaiyuo, Nakamana anda wakale wakale keyange papala nenge dupwa nao waene ipwange rende pingi doko nao dee wambu dolo nenge rapa rapa pii nayami dupwa mokwa soo maiyuo pyuo pupwale. Renge doko yuu gii dake namwana Kamongopa poo pyasi ingyuo silyamo dokona yamarangyuo ee laa nalapape. Kamongona rae maingi renge dokome nakama porainyi pyambwara, leya.

¹¹Lipae akali dupwame wambu peparaee mona sinyu lao lao, Yuu gii dake poo pyasi ingyuo silyamo dokome ee lao kumaraleralale nyii nalapape, lamaiyami. ¹²Pii doko soo nyiyaminyi dokome wambu peparaee kata nyuo papala nenge nao ipwa nao nenge mokwa soo maiyuo raeme kumuo piyami.

Anda Kauwa Pipala Palyuo Nenge Nenge Yuu Gii Doko

¹³Mawa Pii mana nyeramaña lao yuu gii lapo dokopa ree palunya rakange kyawa dupwape purisi akalipi Lipae akali dupwapeme Esera mawa pii mana lenge akali kareyamo dokona epo pyasiyami. ¹⁴Dokopa nakamame mawa pii pepa pyasi Kamongo dokome Mosese keta pyao retena leyamo doko Isaraele wambu dupwa nenge yalya kando nenge nenge kana yanda ipingi dokopa anda kauwa dupwana mee palirami leyamo doko kando nyiyami. ¹⁵Dopa pyuo kando nyepala dokopa yuu taone dupwanape yuu Jerusaleme dokonape pyao reto lamaiyuo, Anda kauwa pinya karo dokopa yuu kyau kuki dupwana papala isa olipi anginya wangyape olipi ayangena wangyape isa metilipi bona isape dee isa wakalena wangyape nyerami lao pyasi palamo dokona letamuli pyuo pirama.

¹⁶Dopa pyuo wambumi pao nyepala dokome nakamana semene anda yangi ketae warake dupwanape kamapi dupwanape Anatunya anda kamapi dokonape kame kambu kingi Ipwa lengena kamapi dokonape dee kame kambu kingi Eporaima lengena kamapi dokonape dusipana peparaee anda kauwa rangena piyami. ¹⁷Dokopa wambu yuu nanesa karapusi ingyuo palyuo epeyami dupwame anda kauwa pipala paleyami. Doko

yuu gii Josua Nanena ikinyingi kareyamo dokona piso pao anda kauwa dopale pii naoko pao dolomame kanda soo piyami. Dopa pyuo pipala nakama raeme kumuyami. ¹⁸Koro mendakinya nenge nao peteyaminyi dokopa yuu peparae lao Esera baame Anatunya Mawa Pii palenge buku dokona yaka lapa piya. Dee yuu gii mange lama dokopa Mawa Pii leyamuli pyuo misi lao kii palyiyami.

Wambu Dupwame Nakamana Koo Dupwa Polo Leyami

9 ¹Kana mendaki dokonako yuu gii akalisa lama ipisu kisima dokopa Isaraele wambu dupwa epo mendakinya pisipala nakamana koo dupwana lao sakame kumuo nenge naa nao peteyami. ²Nakama yuu wakale range wambu dupwa liti pipala kareyami. Dopa pipala dokopa kumanda piso wapungi komau wapuo pee awaiپی pyapala nakamana koopee dee rora ambasupi dupwana yulu koo piyami dupwa kanda soo polo leyami. ³Leyaminyi dokopa wambu lapome Anatunya mawa pii dupwa keloke gii rema nembo yaka leyami. Lapala dokopa dee keloke gii remako nembo nakamana koo dupwa polo lao dee nakamana Kamongo Anatu lakando kareyami.

⁴Jesuumoo Bani Katemele Sepanaya Buni Serepaya Bani dee Kenanimoo dupwa peparae Lipae rara dokona kareyami. Rate kuki dokona karo nakamana Kamongo Anatu lao pii ketae palyuo atēja leyami.

⁵Lipae rara dupwa atēja lao piyami dokona wambu dupwa dopako pyuo misi lao pinya leyami. Jesuumoo Katemele Bani Asapenaya Serepaya Otaya Sepanaya Petatayamoo dusipame lao,

Roya karapala nakamana Kamongo Anatunya lao kingi lakandalapape.

Baa yuu peparae lakando karalu karalapape.

Karapala mee akalimi ingyuo embena kingi kapa lakanda nalyaminyipape

Kamongo embena kingi neta renge doko wambu peparame angi ingyuo lakandenale.

Ateņa Pyao Koo Dupwa Polo Leyami

⁶Isaraele wambu dupwame atēja dake piyami.

Kamongo doko embako iki Kamongo ingyiyamo.

Embame yakepe yakena buipi pyuo wasii.

Embame yuupi ipwa kotape bange silyamo dupwa peparape embame pyuo wasii.

Bange dupwa peparae embame letena renge maii.

Aņala yake panda karaminyi dupwame emba lao pangu soo lakandenge.

- 7 Emba Kamongo Anatu, embame Aporame rombo palyii.
Embame baa yuu Babilone yuu kuki Ua doko yaki nyuo lanyuo pee.
Papala embame banya kingi doko alowa pyuo Aporakame lee.
- 8 Embena yulu dokona yaki nyii nao mondo lao pyakao kareyamo
kandee.
Dokona embame baapa kando lao kana minyuo lalu lao lee.
Embame yuu Kenanepa
Iti rangepe Amo rangepe Perasi rangepe Jepusi rangepe Gukase range
dupwa palenge dupwanape banya ree palu dupwa palirami lao
Mairu lao doko lalu lao leepya
Embame lenge nyili pyuo pingi dokona embena lalu lao lenge doko
kaeya nao minyingi.
- 9 Namwana rora ambasupi dupwa apa pyuo yuu Isipi dokona randa
nyiyami doko kandee kande.
Wambu dupwame Ipwa Kota Pete Kone lenge marengi dokona karo
nyisala ipu leyami doko emba sii.
- 10 Embena wambu dupwa randa maiyami doko emba sepala
Embame yulu pii nange yamarangaramili dupwa kiŋi Peraope banya
akali mupwape dee banya yuu range wambupi keta randa maiyuo
pii.
Dopa pyuo anamasi minyii dokona embena kingi doko andake
ingyuo silyamo.
- 11 Ipwa kota dokona sukusa embena wambu dupwa pena lapala kata
lanyuo peenesa oo lasi siyamo dokona epeyami.
Peteta epeyami dupwa embame ipwa kota kiwa dokona kana nyuo
yalyalamuli pyuo nyuo yalu piipya.
- 12 Korakama dokopa kopa soo lanyuo pao
kukwa dokopa isare rao lanyuo pao piipya.
- 13 Yake dokona karo epo yuu Sainai kyau dokona embena wambu
dupwa pii lamaii.
Mawa pii keyange dupwa maiyuo mana pii rolae dupwa lamaiyuo pii.
- 14 Juu wambunya koro petenge yuu gii poo pyasi dokona waso karena
lao mana lamaiyuo dee embena kendemande Mosese keta embena
mawa pii dupwa maiyuo pii.
- 15 Wambu dupwa lopayami dokopa yake dokona piso borete maiyuo
dee ipwa nanayami dokopa kana dokona ipwa guu lanyu
peyakamyuo piipya.
Embame yuu mairu lao lalu lao lene doko nyuo kalyinya lao lamaii.
- 16 Dopa piyamopape namwana rora ambasupi dupwame nakama range
andanyi nembo

- mona kana pokapala embena mawa pii dupwa kando kamba lao kareyami.
- 17 Embena yulu piinyi dupwa nyuo kame sepala kamba leyami.
Embame yulu pii napengele lapo pii kande dupwa kame sepala kamba leyami.
Nakama kyaŋe soo karo akali mupwa mende Isipi dokona kapu kyuo wambu dupwa kendemande ingyuo karena lao dee lanyuo pena lao rangeme rombo palyiyami.
Dopa piyamopape emba Anatu dokome nyuo kame singi.
Emba ipyapala mona keyange palenge.
Emba mona reto karenge.
Emba waiya lao imbwa nange.
Embena kondo sakange kumungi renge doko kamame andake.
Embame nakama yaki nyii nange.
- 18 Wambu dupwame kingimi mena bulamakao yale mende pyuo wasapala doko namwa Isipi karo nyuo lanyuo epeya dokoŋo leyami.
Yuu malu mee leyaminyi dokopa Kamongo emba isipyao leyami.
- 19 Dopa leyaminyipape embena kondo sakame kumungi renge doko kamame wakasa
dokome yuu muiyane dokona embame wambu dupwa kyawa yaki nyuo kaeya naye.
Kukwa korakamape kata lasaka piinyi doko isare kopape dolapo nyisa nyii naye.
- 20 Emba keta renge keyange palenge dokome nakama apa pyuo pirami dokona lao mana lamaiyuo
dee nenge myanape ipwape nena lao maiyuo kareya.
- 21 Ee kana akalisa kisima dusipana yuu muiyane dokona epo kareyami dokopa nenge naramili dupwa maii.
Nakamana komau dupwa kangu paa nao
dee nakamana kimbu dupwa randa pyuo rondo laa nao piya.
- 22 Embame wambu rarape yuu isingipi dee nakamana yuu range dokona repeta singi yuupi anamasi minyinya lee kande kiŋi Sayone banya iso karenge yuu doko Esepone anamasi miniyiyami.
Dee kiŋi Okona yuu Besane doko opetaeko anamasi miniyiyamiko.
- 23 Embame akali wai kisinyipa yakena bui karapyamo mendeme yaka laa nalyaminyi dopale inginyi pyambii.
Nakamana rora ambasu dupwa yuu doko mairunupa palirami lao lalu lao leene dokona
nakamame anamasi minyuo epo palena lee.
- 24 Nakamame yuu Kenane doko pyao isa palyiyami.
Embame wambu yuu dokona paleyami dupwa pyao anamasi minyii.

Minyapala dokopa wambu dupwape dee kiŋi dupwape yuu
 Kenane kareyaminyi dupwa nakama keta maipala pyalana suu
 pilyaminyili pyuo mee pinya lapala kaeyo.

25 Yuu taone andake kana kame porai dokome minyaro karengepe yuu
 amenge pingipi anda bange keyange kana malu parali dupwa pale
 palepe ipwa yuwale kyasi sinya singipi olipi isape jingi lyingi isa
 lapope dee isa girapo ee dupwape peparae embena wambu dupwame
 nyiyami.

Nakama nalana suu piyami dupwa mee napala ando rondo lasi
 ingiyami.

Embame bange keyange maingi dupwana lao moname nyiyami.

26 Dopa piinyipape embena wambu dupwame emba kando kamba lao
 embena Mawa Pii dupwa yalo kareyami.

Nakama emba keta kapu kyo epena lao repe repe lao kareyami
 poropeta akali dupwa pyao kumakayami.

Nakamame emba kando yuu yangama yangama lao kilya kando lao
 kareyami.

27 Dokona embame nakamana yanda pimwai dupwame nakama
 anamasi minyapala iso karena lao pii.

Nakamana randa nyepala emba nyisapili lao kee leyami dokopa
 embame yake dokona piso nakamana pii sepala nyiso karee.

Embame kondo sakame kumungi dokome nakamana nyisu
 petenge dupwa keta kiiramo nyeramiŋi lao akali mupwa dupwa
 mai.

28 Mona kyuu lao siyamo kareyami dokopa dee yulu koo dupwa
 pyuoko kareyami.

Dopa piyaminyisa nakamana yanda pimwai dupwame dee kamba
 nyuo anamasi minyinya lao kata maipala kaeye.

Dopa piinyi dokopa nakamana koo dupwa polo lao dee emba nyisa
 lao piso siyami dokopa

yake panda karo sepala embena kondo sakame kumungi reŋe
 dokome deeko kyawa lete nyuo karee.

29 Embena mana pii doko rape rape lao pinya lapala repe repe
 lamaiyuo karee.

Akali mendeme embena Mawa Pii minyuo kareŋe doko lete para
 kata singi.

Dopa piyamopape wambu dupwa moŋo kyare siyami dokome
 embena Mawa Pii dupwa yaki nyakao mata maiyami.

Ayemba suu pipala mona kana poko emba letenyili pyuo pii narama
 daa lao kareyami.

- 30 Ee kana peparaee embame wambu dupwa pipya imbu singi nyii nao
waa waa lao repe repe lamaiyuo karee.
Embena poropeta akali dupwa keta nakama pii lamainyipa embena
wambu dupwa kale poeyasa see nayami.
Dokona lao wambu yuu lili wakale lapome embena wambu dupwa
iso karena lao panda maiyuo kaeye.
- 31 Dopa piyamopape embena kondo sakame kumungi renge doko
kamame wakasa ingiyasa nakama pyao kokwa soo koo keta palya
nana lao yaki nyii naye.
Emba ama sakame kumungi Anatu dokome ipyuo mona keyange
palyuo dopa pyuo nyiso kareng.
- 32 Anatu, Namwana Anatu doko emba kamame wakasa.
Emba ama porainya renge palenge doko wambu soo pako
karaminyi.
Embena pii lalu lao lao kana minyngi doko emba yaki nyii nange.
Asiria kiŋi dupwame namwa piyaminyi yuu gii dokona piso pao
epapu dokona namwa randa andake nyuo karamano.
Namwana kiŋi dupwape namwana lita dupwape namwana purisi
dupwape namwana poropeta dupwape namwana rora ambasu
dupwape dee namwana wambu peparaee randa nyuo kareyami.
Dokona namwa randa kuki lama nyiyamape lao suu pyape.
- 33 Namwa koo pingi dokopa embame namwa rolae pyuo pyalana pyuo
randa jingi.
Dopa pyuo namwa koo pilyamanopape embame namwa yaki nyii
nage.
- 34 Namwana rora ambasupi namwana kiŋipi namwana litape dee
purisipi dupwa peparaeme embena Mawa Pii doko minya
nayami.
Nakamame embena repe repe piipi embena pinya lao pii poraiyuo
ingyuo lengepe dupwa see nayami.
- 35 Embame nakama elyape keta pisi dokopa kiŋi dupwame embena
wambu dupwa mondo lao iso kareyami.
Embame yuu amenge kapape paleta pee lasi doko mainyipape koo
dupwa wanja nayami dokome embena yulu pii nayami.
- 36 Dakepa doko embame namwa yuu amengeko nenge kakana pingi
jiinyi dokona epapu kendemande ingyuo karamano.
- 37 Lao namwa koo piyamano dokome embame kiŋi dupwa namwa isinya
lao jiinyisa yuunya nenge jingi wara piyama dupwa nakama keta
pelyamo.
Namwana mena dee namwape nakama mende pinya suu pyaminyili
pyuo piminyisa randa nyuo mona rumbingi karamano.

Wambu Dupwame Dopa Pirama Lao Lao Palyapala Pyao Reteyami

³⁸Yulu dupwa peparae piyamo dokona namwa Juu wambu dupwa epapu namwa pii kinyi mendakinya palyuo lapala pepa pyao retelyamano. Dokona namwana litape namwana Lipae rarape namwana purisipi dupwame nakamana kingi pyao make retelyaminyi.^e

^e **10:1–13:31** Wambumi kana minyuo lalu lao lao kingi retelyaminyi kingi dupwa pyasi palamo. Dee apa pyuo wambu kana minyuo lalu lao lengenyili pyuo kararami pii palamo (rombo 10). Wambu dupwa yuu Jerusalemepe yuu Juta taone wakale dupwanape wambu akipare kareyami. Dee purisipi Lipaepe dupwana kingi pyasi palamo. Dee kana kame pyuo otapala misi leyaminyi dokoape apa pyuo tembole anda dokona misi larami pii dupwape dee yulu lapo Niyamaya baa alowa piyamo dupwape rombo 11-13 dokona pyasi palamo.